

阿難取衣與婦即時受教則取衣與婦著衣
竟稽首佛足却坐一面佛即說經爲現罪福
人命無常合會有別生者有死不生不終一
切本空自作起滅展轉五道譬如車輪已解
本無不復起分婦聞佛言心開意解即發無
上正真道意即時得立不退轉地愁憂除愈
如日無雲佛說如是四輩歡喜諸天龍神稽
首而退

佛說婦人遇辜經

佛說四天王經

宋沙門釋智嚴共寶雲譯

聞如是一時佛在舍衛國祇樹給孤獨園佛
告諸弟子慎汝心念無受六欲湫情去垢無
求爲首內以清淨外當盡孝以四等心奉養
孝九
所生晨入尊廟稽首悔過朝稟暮誦思經妙
義以佛重戒治心穢病齋肅靖處數息禪定
反流盡源以求道真壽命猶電恍惚即滅齋
日責心慎身守口諸天齋日伺人善惡須彌
山上即第二天天帝名因福德巍巍典主四

天四天神王即因四鎮王也各理一方常以月八日遣使者下案行天下伺察帝王臣民龍鬼蜎飛蚊行蠕動之類心念口言身行善惡十四日遣太子下十五日四王自下二十三日使者復下二十九日太子復下三十日四王復自下四王下者日月五星二十八宿其中諸天僉然俱下四王命曰勤伺衆生施行吉凶若於斯日有歸佛歸法歸比丘僧淨心守齋布施貧乏持戒忍辱精進禪定翫經散說開化盲冥孝順二親奉事三尊稽首受

法行四等心慈育衆生者具分別之以啓帝釋若多修德精進不怠釋及輔臣三十二人僉然俱喜釋勅伺命增壽益算遣諸善神營護其身隨戒多少若持一戒令五神護之五戒具者令二十五神營衛門戶凶疫衆邪陰謀消滅夜無惡夢縣官盜賊水火災變終而不害禳禍滅怪唯斯四等五戒六齋耳猶如大水而滅小火豈有不滅者乎臨其壽終迎其鬼神上生天上七寶宮殿無願不得若有不濟衆生之命穢濁盜竊姪犯他妻兩舌惡

罵妄言綺語歆禱呪詛嫉妬恚癡逆道不孝
違佛遠法謗比丘僧善惡反論有斯行者四
王以聞帝釋及諸天僉然不悅善神不復營
護之即令日月無光星宿失度風雨違時以
現世人欲其改往修來洗心齋肅首過三尊
四等養親忠于帝王慈心諫諍至誠無欺反
前修來捐穢濁之操就清淨之道若有改邪
行就正真者帝釋四王靡不歡喜日月即清
明星宿有常風雨順時毒氣消歇天降甘露
地出澤泉水穀滋味食之少病華色弈弈壽

命益長生不更牢獄死得上天天上福德所
願自然飛行存亡項有日光食自消化無有
便利之患身中香潔口氣苾芬今日月星宿
即諸天宮宅也七寶殿堂懸處虛空在意所
之壽終下生侯王之家顏華煒煒見者心歡
逢佛值法賢聖相連力行不與罪會必得泥
洹斯皆五戒十善歛情攝欲六齋使然拘留
秦佛時人壽六萬歲民性無爲護彼猶養已
平等無二彼佛去世正教衰薄民無正行以
漸爲惡其壽日減至于百歲吾善逝後民違

佛教無復孝子司命減算壽日有滅天神不
祐凶疫惡鬼日來侵害災怪首尾願與意違
非禍縱橫生罹王法之囹圄死入地獄餓鬼
畜生若出爲人必爲下賤善惡追身猶若五
穀隨其所種獲其果實亦如夜書火滅字存
身死名滅殃福不朽慎護汝心攝身守口五
戒十善可從得道吾今得佛積行所致諸弟
子聞經歡喜作禮而去

佛說四天王經

佛說摩訶迦葉度貧母經

宋三藏法師求那跋陀羅譯

聞如是一時佛在舍衛國度於君民與除鐘
衆菩薩大士天龍鬼神世間人民無央數衆
會聽經是時摩訶迦葉獨行教化到王舍城
常行大哀福於衆生捨諸豪富而從貧乞摩
訶迦葉時欲分衛若其未行先三昧正受何
所貧人吾當福之即入王舍大城之中見一
孤母最甚貧困在於街巷大糞聚中傍鑿糞
聚以爲巖窟羸劣疾病常卧其中孤單伶仃